

李時珍全集

史世勤 賀昌木 主編

LISHIZHEN QUANJI

《本草綱目》第三十九至五十二卷

《瀕湖脈學》

《奇經八脈考》

附錄

4



湖北教育出版社

李時珍全集

4

《本草綱目》第三十九至五十二卷

《瀕湖脉學》《奇經八脉考》 附錄

湖北教育出版社

主編 史世勤 賀昌木
副主編 (按姓氏筆畫爲序)
毛德華 李軒錦 張林茂

編委 (按姓氏筆畫爲序)
葉發正 藍正字

編委 (按姓氏筆畫爲序)
毛德華 史世勤 李軒錦
何斌 竺星 張林茂
賀昌木 葉發正 藍正字
學術秘書 毛德華(兼)

尿主治惡瘡

別鬼氣

編

委

(按姓氏筆畫爲序)

附方一瘰癧

復發虎尿

編

委

(按姓氏筆畫爲序)

金

尿中骨主治爲屑治火瘡

破傷風

時珍

附方一

斷酒

虎尿中骨燒灰酒服方

千金方

豹中品

(鄂)新登字 02 号

图书在版编目(CIP)数据

李时珍全集①. ②. ③. ④./ (明)李时珍著; 史世勤, 贺昌木
主编. —武汉: 湖北教育出版社, 2004
ISBN 7—5351—3946—9

I. 李… II. ①李… ②史… ③贺… III. ①李时
珍(1518~1593)—全集 ②中国医药学—文集 IV. R2-53

中国版本图书馆 CIP 数据核字(2004)第 083981 号

出版 发行: 湖北教育出版社
网址: <http://www.hbedup.com>

武汉市青年路 277 号
邮编: 430015 电话: 027-83619605
邮购电话: 027-83669149

经 销: 新 华 书 店
印 刷: 湖北新华印务有限公司 (430034·武汉市汉口解放大道 145 号)
开 本: 850mm×1168mm 1/32 18 插页 118.25 印张
版 次: 2004 年 8 月第 1 版 2004 年 8 月第 1 次印刷
字 数: 2520 千字 印数: 1—1 000

ISBN 7—5351—3946—9/G·3253

(全套共四卷)定价: 240.00 元

如印刷、装订影响阅读, 承印厂为你调换

《本草綱目》第三十九卷

蟲 部

李時珍曰：蟲乃生物之微者，其類甚繁，故字從三虫會意。按《考工記》云：外骨、內骨、却行、仄行、連行、紆行，以脰鳴、注味同鳴、旁鳴、翼鳴、腹鳴、胸鳴者，謂之小蟲之屬。其物雖微，不可與麟、鳳、龜、龍為伍；然有羽、毛、鱗、介、倮之形，胎、卵、風、濕、化生之異，蠢動含靈，各具性氣。錄其功，明其毒，故聖人辨之。況蛭、蜚、蟻、蜚，可供饋食者，見于《禮記》；蜈、蠶、蟾、蝎，可供匕劑，載在方書。《周官》有庶氏除毒蟲，剪氏除蠹物，蠃氏去蛙黽，赤祓氏除牆壁狸蟲（蠹蝨之屬），壺涿氏除水蟲（狐蟻之屬）。則聖人之于微瑣，罔不致慎。學者可不究夫物理而察其良毒乎？於是集小蟲之有功、有害者為蟲部，凡一百零六種，分為三類：曰卵生，曰化生，曰濕生。舊本蟲魚部三品，共二百三十六種。今析出鱗、介二部，并入六種，移入八種入禽獸、服器部，自有名未用移入六種，木部移入二種。

《神農本草經》二十九種梁陶弘景注 《名醫別錄》一十七種梁陶弘景注 《唐本草》一種唐蘇恭 《本草拾遺》二十四種唐陳藏器 《海藥本草》一種唐李珣 《開寶本草》二種宋馬志 《圖經本草》二種宋蘇頌 《日華本草》一種

宋人大明 《證類本草》二種 宋唐慎微 《本草會編》一種 明汪機 《本草綱目》二十六種 明李時珍

附注 魏李當之《藥錄》 吳普《本草》 宋雷斅《炮炙》 齊徐之才《藥對》 唐甄權《藥性》 唐孫思邈《千金》 唐楊損之《刪繁》 孟詵《食療》 南唐陳士良《食性》 蜀韓保昇《重注》 宋掌禹錫《補注》 寇宗奭《衍義》 張元素《珍珠囊》 元李杲《法象》 王好古《湯液》 朱震亨《補遺》 吳瑞《日用》 明汪穎《食物》

蟲之一 卵生類上二十三種

目 錄

蜂蜜《本經》 靈雀附 蜜蠟《本經》 蜜蜂《本經》 土蜂
《別錄》 大黃蜂《別錄》 露蜂房《本經》 竹蜂《拾遺》
赤翅蜂《拾遺》 獨脚蜂《拾遺》 蠓螽《本經》（即果
蠃） 雄黃蟲附 蟲白蠟《會編》 紫釧《唐本》（即紫梗） 五
倍子《開寶》（百藥煎） 螳螂、桑螵蛸《本經》 雀瓮《本
經》（即天漿子） 蠶《本經》 原蠶《別錄》（即晚蠶） 石
蠶《本經》 雲師、雨虎附 九香蟲《綱目》 海蠶《海藥》
雪蠶《綱目》 枸杞蟲《拾遺》 薇香蟲《綱目》
右附方舊六十四，新二百零五。

蟲之一 卵生類上二十三種

蜂 蜜 《本經》上品

【釋名】 蜂糖俗名生岩石者名石蜜《本經》石飴同上岩蜜時珍曰：蜜以密成，故謂之蜜。《本經》原作石蜜，蓋以生岩石者為良耳，而諸家反致疑辯。今直題曰蜂蜜，正名也。

【正誤】 恭曰：土蜜出氏、羌中最勝。今關中白蜜，甘美耐久，全勝江南者。陶以未見，故以南土為勝耳。今以水牛乳沙糖作者，亦名石蜜。此蜜既蜂作，宜去石字。宗奭曰：《嘉祐本草》石蜜有二：一見蟲魚，一見果部。乳糖既曰石蜜，則蟲部石蜜，不當言石矣。石字乃白字誤耳，故今人尚言白沙蜜。蓋新蜜稀而黃，陳蜜白而沙也。藏器曰：岩蜜出南方岩嶺間，入藥最勝，石蜜宜改為岩字。蘇恭是荆襄間人，地無崖險，不知石蜜之勝故也。時珍曰：按《本經》云：石蜜生諸山石中，色白如膏者良。則是蜜取山石者為勝矣。蘇恭不考山石字，因乳糖同名而欲去石字；寇氏不知真蜜有白沙而偽蜜稀黃，但以新久立說，并誤矣。凡試蜜以燒紅火箸插入，提出起氣是真，起烟是偽。

【集解】 《別錄》曰：石蜜生武都山谷、河源山谷及諸山石間。色白如膏者良。弘景曰：石蜜即崖蜜也，在高山岩石間作之，色青，味小酸，食之心煩，其蜂黑色似虻。其木蜜懸樹枝作之，色青白。土蜜在土中作之，色亦青白，味醱。人家及樹空作者亦白，而濃厚味美。今出晉安檀崖者多土蜜，云最勝。出東陽臨海諸處，及江南向西者多木蜜。出于潛、懷安諸縣者多崖蜜。亦有樹木及人家養者。諸蜜例多添雜及煎煮，不可入

藥。必須親自看取，乃無雜耳。凡蜂作蜜，皆須人^①小便以釀諸花，乃得和熟，狀似作飴須藥也。藏器曰：尋常蜜亦有木上作者，土中作者。北方地燥，多在土中；南方地濕，多在木中。各隨土地所宜，其蜜一也。崖蜜別是一蜂，如陶所說出南方崖嶺間，房懸崖上，或土窟中。人不可到，但以長竿刺令蜜出，以物承取，多者至三四石，味醱色綠，入藥勝于凡蜜。張華《博物志》云：南方諸山，幽僻處出蜜蠟。蜜蠟所着，皆絕岩石壁，非攀緣所及。惟于山頂以籃舉懸下，遂得采取。蜂去餘蠟在石，有鳥如雀，群來啄之殆盡，名曰靈雀。至春蜂歸如舊，人亦占護其處，謂之蜜塞。此即石蜜也。頌曰：食蜜亦有兩種：一在山林木上作房，一在人家作窠檻收養之，蜜皆濃厚味美。近世宣州有黃連蜜，色黃，味小苦，主目熱。雍、洛間有梨花蜜，白如凝脂。亳州太清宮有檜花蜜，色小赤。柘城縣有何首烏蜜，色更赤。并蜂采其花作之，各隨花性之溫涼也。宗奭曰：山蜜多在石中木上，有經一二年者，氣味醇厚。人家者，一歲二取，氣味不足，故不及，且久收易酸也。時珍曰：陳藏器所謂靈雀者，小鳥也。一名蜜母，黑色。正月則至岩石間尋求安處，群蜂隨之也。南方有之。

【修治】

敷曰：凡煉蜜一斤，只得十二兩半是數。若火少、火過，并用不得。時珍曰：凡煉沙蜜，每斤入水四兩，銀石器內，以桑柴火慢煉，掠去浮沫，至滴水成珠不散乃用，謂之火水煉法。又法：以器盛，置重湯中煮一日，候滴水不散，取用亦佳，且不傷火也。

【氣味】

甘，平，無毒。《別錄》曰：微溫。穎曰：諸蜜氣味，當以花為主。冬、夏為上，秋次之，春則易變而酸。閩、廣蜜極熱，以南方少霜雪，諸花多熱也。川蜜溫，西蜜則涼

^① 人：《政和本草》及四庫全書本、人衛本同。考上下文義，當改作“入”。

矣。劉完素曰：蜜成于蜂，蜂寒而蜜溫，同質异性也。時珍曰：蜂蜜生涼熟溫，不冷不燥，得中和之氣，故十二臟腑之病，罔不宜之。但多食亦生濕熱蟲蠱，小兒尤當戒之。王充《論衡》云：蜂蠆稟太陽火氣而生，故毒在尾。蜜為蜂液，食多則令人毒，不可不知。煉過則無毒矣。宗奭曰：蜜雖無毒，多食亦生諸風也。朱震亨曰：蜜喜入脾。西北高燥，故人食之有益；東南卑濕，多食則害生于脾也。思邈曰：七月勿食生蜜，令人暴下霍亂。青赤酸者，食之心煩。不可與生葱、萵苣同食，令人利下。食蜜飽後，不可食鮓，令人暴亡。

【主治】 心腹邪氣，諸驚癇瘕，安五臟諸不足，益氣補中，止痛解毒，除衆病，和百藥。久服，強志輕身，不饑不老，延年神仙。《本經》養脾氣，除心煩，飲食不下，止腸澼，肌中疼痛，口瘡，明耳目。《別錄》牙齒疳蠱，唇口瘡，目膚赤障，殺蟲。藏器治卒心痛及赤白痢，水作蜜漿，頓服一碗止；或以薑汁同蜜各一合，水和頓服。常服，面如花紅。甄權治心腹血刺痛，及赤白痢，同生地黄汁各一匙服，即下。孟詵同薤白搗，塗湯火傷，即時痛止。宗奭。《肘後》：用白蜜塗上，竹膜貼之，日三。和營衛，潤臟腑，通三焦，調脾胃。時珍

【發明】 弘景曰：石蜜道家丸餌，莫不須之。仙方亦單服食，云致長生不老也。時珍曰：蜂采無毒之花，釀以大^①便而成蜜，所謂臭腐生神奇也。其入藥之功有五：清熱也，補中也，解毒也，潤燥也，止痛也。生則性涼，故能清熱；熟則性溫，故

① 大：據本條“集解”文，當作“小”。

能補中。甘而和平，故能解毒；柔而濡澤，故能潤燥。緩可以去急，故能止心腹、肌肉、瘡瘍之痛；和可以致中，故能調和百藥，而與甘草同功。張仲景治陽明結燥，大便不通，蜜煎導法，誠千古神方也。詵曰：但凡覺有熱，四肢不和，即服蜜漿一碗，甚良。又點目中熱膜，以家養白蜜為上，木蜜次之，崖蜜更次之也。與薑汁熬煉，治癩甚效。

【附方】

舊十三，新六。大便不通張仲景《傷寒論》云：陽明病，自汗，小便反利，大便硬者，津液內竭也，蜜煎導之，用蜜二合，銅器中微火煎之，候凝如飴狀，至可丸，乘熱捻作挺，令頭銳，大如指，長寸半許。候冷即硬，納便道中，少頃即通也。一法：加皂角、細辛（為末）少許，尤速。噫不下食取崖蜜含，微微咽下。《廣利方》產後口渴用煉過蜜，不計多少，熱水調服，即止。《產書》難產橫生蜂蜜、真麻油各半碗，煎減半服，立下。《海上方》天行虜瘡比歲有病天行斑瘡，頭面及身，須臾周匝，狀如火瘡，皆戴白漿，隨決隨生。不即療，數日必死。差後瘡癰黯色，一歲方滅，此惡毒之氣。世人云：建武中，南陽擊虜所得，仍呼為虜瘡。諸醫參詳療之，取好蜜通摩瘡上，以蜜煎升麻，數數拭之。《肘後方》痘疹作癢難忍，抓成瘡及疱，欲落不落。百花膏：用上等石蜜，不拘多少，湯和，時時以翎刷之。其疔易落，自無癰痕。《全幼心鑒》癰疹瘙癢白蜜不以多少，好酒調下，有效。五色丹毒蜜和乾薑末傅之。《肘後》口中生瘡蜜浸大青葉含之。《藥性論》陰頭生瘡以蜜煎甘草塗之。《外臺》肛門生瘡肛門主肺，肺熱即肛塞腫縮生瘡。白蜜一升，豬胆汁一枚相和，微火煎令可丸，丸三寸長作挺，塗油納下部，卧令後重，須臾通泄。《梅師》熱油燒痛以白蜜塗之。《梅師》疔腫惡毒用生蜜與隔年葱研膏，先刺破塗之。如人行五里許，則疔出，後以熱醋湯洗去。

《濟急仙方》大瘋癩瘡取白蜜一斤，生薑二斤搗取汁。先秤銅鑊斤兩，下薑汁于蜜中消之，又秤之，令知斤兩。即下蜜于鑊中，微火煎令薑汁盡，秤蜜斤兩在，即藥已成矣。患三十年癩者，平旦服棗許大一丸，一日三服，溫酒下。忌生冷醋滑臭物。功用甚多，不能一一具之。《食療方》面上黥點取白蜜和茯苓末塗之，七日便瘥也。《孫真人食忌》目生珠管以生蜜塗目，仰臥半日，乃可洗之。日一次。《肘後方》誤吞銅錢煉蜜服二升，可出矣。《葛氏方》諸魚骨鯁以好蜜稍稍服之令下。《葛氏》拔白生黑治年少髮白。拔去白髮，以白蜜塗毛孔中，即生黑髮。不生，取梧桐子搗汁塗上，必生黑者。《梅師方》

蜜 蠟 《本經》上品

【釋名】弘景曰：生于蜜中，故謂蜜蠟。時珍曰：蠟猶蠹也。蜂造蜜蠟而皆成蠹也。

【集解】《別錄》曰：蠟生武都山谷蜜廬木石間。弘景曰：蜂先以此為蜜跖，煎蜜亦得之。初時極香軟。人更煮煉，或少加醋酒，便黃赤，以作燭色為好。今醫家皆用白蠟，但取削之，于夏月暴百日許，自然白也。卒用之，烱內水中十餘遍，亦白。宗奭曰：新蠟色白，隨久則黃。白蠟乃蠟之精英者也。時珍曰：蠟乃蜜脾底也。取蜜後煉過，濾入水中，候凝取之，色黃者俗名黃蠟，煎煉極淨色白者為白蠟，非新則白而久則黃也。與今時所用蟲造白蠟不同。

【氣味】甘，微溫，無毒。之才曰：惡芫花、齊蛤。

【主治】蜜蠟：主下痢膿血，補中，續絕傷金瘡，益氣，不饑，耐老。《本經》權曰：和松脂、杏仁、棗肉、茯苓等分合成，食後服五十丸，便不饑。頌曰：古人荒歲多

食蠟以度饑，但合大棗咀嚼，即易爛也。白蠟：療人泄瀉後重見白膿，補絕傷，利小兒。久服，輕身不饑。《別錄》孕婦胎動，下血不絕，欲死。以鷄子大，煎三五沸，投美酒半升服，立瘥。又主白髮鑷去，消蠟點孔中，即生黑者。甄權

【發明】

時珍曰：蜜成于蠟，而萬物之至味，莫甘于蜜，莫淡于蠟，得非厚于此必薄于彼耶？蜜之氣味俱厚，屬乎陰也，故養脾；蠟之氣味俱薄，屬乎陽也，故養胃。厚者味甘，而性緩質柔，故潤臟腑；薄者味淡，而性奮質堅，故止泄痢。張仲景治痢有調氣飲，《千金方》治痢有膠蠟湯，其效甚捷，蓋有見于此歟？又華陀治老少下痢，食入即吐。用白蠟方寸匕，鷄子黃一個，石蜜、苦酒、髮灰、黃連末，各半鷄子殼。先煎蜜、蠟、苦酒、鷄子四味令勻，乃納連、髮，熱至可丸乃止。二日服盡，神效無比也。此方用之，屢經效驗，乃知《本經》主下痢膿血之言，深當膺服也。

【附方】

舊十八，新十五。仲景調氣飲治赤白痢，小腹痛不可忍，下重，或面青手足俱變者。用黃蠟三錢，阿膠三錢，同溶化，入黃連末五錢，攪勻，分三次熱服，神妙。《金匱》

《千金》膠蠟湯治熱痢，及婦人產後下痢。用蠟二棋子大，阿膠二錢，當歸二錢半，黃連三錢，黃蘗一錢，陳廩米半升，水三鍾，煮米至一升，去米入藥，煎至一鍾，溫服神效。《千金方》急心疼痛用黃蠟燈上燒化，丸芡子大，百草霜為衣，井水下三丸。肺虛咳嗽立效丸：治肺虛膈熱，咳嗽氣急煩滿，咽乾燥渴，欲飲冷水，體倦肌瘦，發熱減食，喉音嘶不出。黃蠟（溶濾令淨，漿水煮過）八兩，再化作一百二十九丸，以蛤粉四兩為衣養藥。每服一丸，胡桃半個，細嚼溫水下，即卧，閉口不語，日二。《普濟方》肝虛雀目黃蠟不俱多少，溶汁取出，入蛤粉相和得所。每用刀子切下

二錢，以豬肝二兩批開，搽藥在內，麻繩扎定。水一碗，同入銚子內煮熟，取出乘熱蒸服。至溫，并肝食之，日二，以平安為度。其效如神。《集驗方》**頭風掣疼**湖南押衙顏思退傳方：用蠟二斤，鹽半斤相和，于銚羅中溶令相入，捏作一兜盞，勢可合腦大小，守頭至額，其痛立止也。《經驗方》**脚上轉筋**劉禹錫讀^①《傳信方》：用蠟半斤銷之，塗舊絹帛上，隨患大小闊狹，乘熱纏脚，須當脚心，便着襪裹之，冷即易。仍貼兩手心。《圖經》**暴風身冷**暴風，通身冰冷如癱緩者。用上方法，隨所患大小闊狹攤貼，并裹手足心。**風毒驚悸**同上方法。**破傷風濕**如瘡者。以黃蠟一塊，熱酒化開服，立效。與玉真散對用，尤妙。《瑞竹堂方》**代指疼痛**以蠟、松膠相和，火炙籠指，即瘥。《千金翼》**脚上凍瘡**濃煎黃蠟塗之。《姚和衆》**狐尿刺人腫痛**。用熱蠟着瘡，并烟熏之，令汁出即愈。《肘後方》**犬咬瘡發**以蠟炙溶，灌入瘡中。《葛氏方》**蛇毒螫傷**以竹筒合瘡上，溶蠟灌之，效。《徐王方》**湯火傷瘡**焮赤疼痛，毒腐成膿。用此拔熱毒，止疼痛，斂瘡口；用麻油四兩，當歸一兩，煎焦去滓。入黃蠟一兩，攪化放冷，攤帛貼之，神效。《醫林集要》**臙脛爛瘡**用桃、柳、槐、椿、棟五枝，同荊芥煎湯，洗拭淨。以生黃蠟攤油紙上，隨瘡大小貼十層，以帛拴定。三日一洗，除去一層不用，一月痊愈。《醫林集要》**妊娠胎漏**黃蠟一兩，老酒一碗，溶化熱服，傾刻即止。呃逆不止黃蠟燒烟熏，二三次即止。《醫方摘要》**霍亂吐利**蠟一彈丸，熱酒一升化服，即止。《肘後方》**諸般瘡毒**臙瘡、金瘡、湯火等瘡。用黃蠟一兩，香油三兩，黃丹半兩，

① 讀：衍字，當刪。

同化開，頓冷，瓶收。攤貼。《王仲勉經驗方》

蜜 蜂 《本經》上品

【釋名】 蠟蜂《綱目》 蜚時珍曰：蜂尾垂鋒，故謂之蜂。蜂有禮範，故謂之蜚。《禮記》云：范則冠而蟬有綏。《化書》云：蜂有君臣之禮。是矣。

【集解】 《別錄》云：蜂子生武都山谷。頌曰：今處處有之，即蜜蜂子也。在蜜脾中，如蠶蛹而白色。嶺南人取頭足未成者，油炒食之。時珍曰：蜂子，即蜜蜂子未成時白蛹也。《禮記》有雀、鷦、蜩、范，皆以供食，則自古食之矣。其蜂有三種：一種在林木或土穴中作房，為野蜂；一種人家以器收養者，為家蜂，并小而微黃，蜜皆濃美；一種在山岩高峻處作房，即石蜜也，其蜂黑色似牛虻。三者皆群居有王。王大于衆蜂，而色青蒼。皆一日兩衙，應潮上下。凡蜂之雄者尾銳，雌者尾岐，相交則黃退。嗅花則以鬚代鼻，采花則以股抱之。按王元之《蜂記》云：蜂王無毒。窠之始營，必造一臺，大如桃李。王居臺上，生子于中，王之子盡復為王，歲分其族而去。其分也，或鋪如扇，或圓如罍，擁其王而去。王之所在，蜂不敢螫。若失其王，則衆潰而死。其釀蜜如脾，謂之蜜脾。凡取其蜜不可多，多則蜂饑而不蕃；又不可少，少則蜂情而不作。嗚呼！王之無毒，似君德也。營巢如臺，似建國也。子復為王，似分定也。擁王而行，似衛主也。王所不螫，似遵法也。王失則潰，守義節也。取惟得中，似什一而稅也。山人貪其利，恐其分而刺其子，不仁甚矣。

蜂 子

【氣味】 甘，平、微寒，無毒。大明曰：涼，有毒。食之者須以冬瓜、苦蕒、生姜、紫蘇制其毒。之才曰：畏黃芩、芍藥、牡蠣、白前。

【主治】 頭風，除蠱毒，補虛羸傷中。久服令人光澤，好顏色，不老。《本經》 弘景曰酒漬傅面，令人悅白。輕身益氣，治心腹痛，面目黃，大人小兒腹中五蟲從口吐出者。《別錄》主丹毒風疹，腹內留熱，利大小便澀，去浮血，下乳汁，婦人帶下病。藏器大風癘疾。時珍

【發明】 時珍曰：蜂子古人以充饌品，故《本經》、《別錄》著其功效，而《聖濟總錄》治大風疾，兼用諸蜂子，蓋亦足陽明、太陰之藥也。

【附方】 新一。大瘋癘疾鬚眉墮落，皮肉已爛成瘡者。用蜜蜂子、胡蜂子、黃蜂子（并炒）各一分，白花蛇、烏蛇（并酒浸，去皮、骨，炙乾）、全蝎（去土，炒）、白僵蠶（炒）各一兩，地龍（去土，炒）半兩，蝎虎（全者，炒）、赤足蜈蚣（全者，炒）各十五枚，丹砂一兩，雄黃（醋熬）一分，龍腦半錢，右為末。每服一錢匕，溫蜜湯調下，日三五服。《總錄》

土 蜂 《別錄》

【校正】 舊與蜜蜂子同條，今分出。

【釋名】 蜚零《本經》 螳蜂音蟬。同上馬蜂頌曰：郭璞注《爾雅》云：今江東呼大蜂在地中作房者為土蜂，即馬蜂也。荆巴間呼為螳蜂。

【集解】 《別錄》曰：土蜂生武都山谷。藏器曰：土蜂穴居作房，赤黑色，最大，螫人至死，亦能釀蜜，其子亦大而白。頌曰：土蜂子，江東人亦啖之。又有木蜂似土蜂，人亦食其子。然則蜜蜂、土蜂、木蜂、黃蜂子俱可食。大抵蜂類同科，其性效不相遠矣。

蜂

- 【主治】 燒末，油和，傅蜘蛛咬瘡。藏器曰：此物能食蜘蛛，取其相伏也。

蜂 子

- 【氣味】 甘，平，有毒。大明曰：同蜜蜂。畏亦同也。
- 【主治】 癰腫。《本經》啞痛。《別錄》利大小便，治婦人帶下。《日華》功同蜜蜂子。藏器 酒浸傅面，令人悅白。時珍
- 【附方】 新一。面黑令白土蜂子未成頭翅者，炒食，并以酒浸傅面。《聖惠方》

房

- 【主治】 癰腫不消。為末，醋調塗之，乾更易之。不入服食。《藥性》療丁腫瘡毒。時珍
- 【附方】 新一。疔腫瘡毒已篤者，二服即愈，輕者一服立效。用土蜂房一個，蛇退一條，黃泥固濟，煨存性，為末。每服一錢，空心好酒下。少頃腹中大痛，痛止，其瘡已化為黃水矣。《普濟》

大 黃 蜂 《別錄》

- 【校正】 舊與蜜蜂同條，今分出。
- 【釋名】 黑色者名胡蜂《廣雅》壺蜂《方言》瓠瓢蜂音鈞婁。玄瓠蜂時珍曰：凡物黑色者，謂之胡。其壺、瓠、瓠瓢，皆象形命名也。瓠瓢，苦瓠之名。《楚辭》云：“玄蜂若壺”，

是矣。大黃蜂色黃，觚觚蜂色黑，乃一類二種也。陶說為是，蘇頌以為一種，非矣。然蜂蛹、蜂房，功用則一，故不必分條。

【集解】 弘景曰：大黃蜂子，乃人家屋上者及觚觚蜂也。頌曰：大黃蜂子，在人家屋上作房及大木間即觚觚蜂之子也。嶺南人取其子作饌食之，其蜂黃色，比蜜蜂更大。按《嶺表錄異》云：宣、歙人好食蜂兒。山林間大蜂結房，大者如巨鐘，其房數百層。土人采時，着草衣蔽身，以捍其毒螫。復以烟火熏房^①蜂母，乃敢攀緣崖木斷其蒂。一房蜂兒五六斗至一石。揀狀如蠶蛹瑩白者，以鹽炒暴乾，寄入京洛，以為方物。然房中蜂兒三分之一翅足已成，則不堪用。據此，則木上作房，蓋觚觚之類。然今宣城蜂子，乃掘地取之，似土蜂也。郭璞注《爾雅》云：土蜂乃大蜂，在地中作房；木蜂似土蜂而小，江東人并食其子。然則二蜂皆可食久矣。大抵性味亦不相遠也。

蜂 子

- 【氣味】 甘，涼，有小毒。大明曰：見蜜蜂下。
- 【主治】 心腹脹滿痛，乾嘔，輕身益氣。《別錄》治雀卵斑，面疱。餘功同蜜蜂子。時珍
- 【附方】 新一。雀斑面疱七月七日取露蜂子，于漆碗中水酒浸過，濾過，調胡粉傅之。《普濟方》

露 蜂 房 《本經》中品

【釋名】 蜂腸《本經》蜂勑勑與窠同。百穿并《別錄》紫金沙

① 房：《政和本草》卷二十蜂子條作“散”。

【集解】

《別錄》曰：露蜂房生牂牁山谷。七月七日采，陰乾。弘景曰：此蜂房多在樹木^①中及地中。今曰露蜂房，當用人家屋間及樹枝間包裹者。乃遠舉牂牁，未解所以。恭曰：此房懸在樹上得風露者。其蜂黃黑色，長寸許，螫馬、牛及人，乃至欲死。非人家屋下小小蜂房也。韓保昇曰：此樹上大黃蜂窠也。所在皆有，大者如瓮，小者如桶，十一、二月采之。宗奭曰：露蜂房有二種：一種小而色淡黃，窠長六七寸至一尺，闊二三寸，如蜜脾下垂一邊，多在叢木深林之中，謂之牛舌蜂；一種多在高木之上，或屋之下，外面圍如三四斗許，或一二斗，中有窠如瓠狀，由此得名玄瓠蜂，其色赤黃，大于諸蜂。今人皆兼用之。敷曰：蜂房有四件：一名革蜂窠，大者一二丈圍，在樹上，內窠小隔六百二十六個，大者至一千二百四十個，其裹粘木蒂是七姑木汁，其蓋是牛糞沫，其隔是葉蕊也；二名石蜂窠，只在人家屋上，大小如拳，色蒼黑，內有青色蜂二十一個，或只十四個，其蓋是石垢，其粘處是七姑木汁，其隔是竹蛀也；三名獨蜂窠，大小如鵝卵大，皮厚蒼黃色，是小蜂并蜂翅，盛向裏只有一個蜂，大如小石燕子許，人馬被螫着立亡也；四名是草蜂窠也。入藥以革蜂窠為勝。時珍曰：革蜂，乃山中大黃蜂也，其房有重重如樓臺者。石蜂、草蜂，尋常所見蜂也。獨蜂，俗名七里蜂者是矣，其毒最猛。

【修治】

敷曰：凡使革蜂窠，先以鴉豆枕等同拌蒸，從巳至未時，出鴉豆枕了，曬乾用。大明曰：入藥并多用。

【氣味】

苦，平，有毒。《別錄》曰：鹹。之才曰：惡乾薑、丹參、黃芩、芍藥、牡蠣。

【主治】

驚癇瘈瘲，寒熱邪氣，癰疾，鬼精蠱毒，腸痔。火熬之良。《本經》療蜂毒、毒腫。合亂

① 木：《政和本草》卷二十一露蜂房條作“腹”。